

Communicaziun da medias digl cumegn da Surses (nr. 02-2017)

Surses: Bunga situaziun finanziaria digl cumegn da Surses

Gl'amprem rendachint digl cumegn da Surses sera cun en surple d'antradas da 10.8 milliuns francs. Siva la fusiun da cumegns stat igl cumegn da Surses damai financialmaintg bagn. Igl resultat ordvart positiv vign mano anavos sen la contribuziun da fusiun e tar antradas supplementaras tar las taglias e concessiuns. Per discutir davart ena reduenziun dallas taglias ègl pero anc mengia bod.

La radunanza communal Surses ò approvo sainza cuntervusch igl rendachint 2016. Chel sera tar antradas da radond 41.44 miu. francs e tar expensas da radond 30.62 miu. francs cun en surple d'antradas da radond 10.8 miu. francs. Chest resultat ordvart positiv ègl d'attribueir cunzont alla contribuziun da fusiun da 8.4 miu. francs ed ad antradas supplementaras da retgavs fiscals e da concessiuns. Cun la fusiun da cumegns per igl 1. da schaner 2016 è er nia decida d'introduer igl model armoniso da contabilitad MAC2. Chegl ò per consequenza, tg'igl è sto da far ena reveletaziun dalla facultad da finanzas, dallas reservas e dallas limitaziuns da chints.

Las investziuns bruttas montan a radond 7.88 miu. francs (investziuns nettas 4.76 miu. francs) e pertotgan surtot las spartas veias e plazzas, veias da gôt ed igl provedimaint d'ava.

Malgro la situaziun finanziaria actualmaintg solida vign ena reduenziun digl pe da taglia betg an dumonda. Gl'amprem ègl d'observar la tendenza dallas finanzas sur ena perioda da ples onns. Tiers vign tg'igl cumegn è confrunto cun en grond volumen d'investziuns, tgi pretenda ressursas finanzialas, p.ex. per la sanaziun ed amplificaziun dalla tgesa da scola Grava a Savognin, la sanaziun digl provedimaint d'ava e da canalisaziun e digl provedimaint d'energeia scu er per investziuns ainten la sparta digl turissem. Ultra da chegl ègl da chintar igls proxims onns cun pi pacas antradas da taglias e - tot tenor las decisiuns dalla politica federala - da tschains d'ava.

Vendita den taragn da dretg da biagier

Sainza cuntervusch ò la radunanza communal er approvo la vendita dalla parcella da dretg da biagier no. 765, Plaz la Rezia, a Tinizong, per en prietsch da fr. 55'100.00 all'interpresa Caspar Haustechnik SA. La parcella ò ena surfatscha da 1'102 m² e sa catta ainten la zona d'industria Gravas a Tinizong.

Ulteriours sclarimaints dat igl mastral Leo Thomann (telefonign 079 405 96 73)

Tinizong, igls 21 d'avost 2017